

NO. SOALAN: 111

**PEMBERITAHUAN PERTANYAAN BAGI BUKAN JAWAB LISAN
DEWAN RAKYAT**

PERTANYAAN : BUKAN JAWAB LISAN

**DARIPADA : DATO' SRI ABDUL MANAN BIN ISMAIL
[PAYA BESAR]**

RUJUKAN : 10398

SOALAN:

**Dato' Sri Abdul Manan Bin Ismail [Paya Besar] minta MENTERI
DALAM NEGERI menyatakan jumlah belia yang dikenal pasti terlibat
dalam pengambilan najis dadah mengikut kaum secara terperinci
serta langkah dalam membasmi gejala ini khususnya di kawasan
pedalaman termasuk FELDA.**

28

JAWAPAN:

Tuan Yang Dipertua,

Seramai 9,819 orang belia (19 - 39 tahun) dikenal pasti terlibat dengan pengambilan dadah sehingga Ogos 2017 terdiri daripada 8,282 orang Melayu, 505 orang Cina, 569 orang India, 382 orang pribumi Sabah, 38 orang pribumi Sarawak dan 43 orang lain-lain kaum.

Bagi membanteras penagihan dadah di kawasan luar bandar terutamanya di FELDA, Kementerian melalui Agensi Antidadah Kebangsaan (AADK) telah melancarkan program Perangi Dadah Habis-Habisan (PDH) dengan kerjasama pelbagai pihak seperti Polis Diraja Malaysia, Jabatan Sukarelawan Malaysia (RELA), Lembaga Kemajuan Ikan Malaysia (LKIM), Jawatankuasa Pemulihan Dadah Daerah (JKPD), Jawatankuasa Kemajuan dan Keselamatan Kampung dan badan bukan Kerajaan (NGO).

Program PDH ini telah dilaksanakan sejak tahun 2016 dan diteruskan pada tahun 2017. Sebanyak 6 program telah dirancang dan dilaksanakan seperti berikut:

- i. program *omnipresence* - kehadiran pihak berkuasa atau pasukan bertugas dalam sesuatu kawasan tumpuan untuk meningkatkan rasa selamat dan keyakinan ahli komuniti;**

- ii. operasi pengesanan dan penahanan - mengesan dan menahan penagih-penagih dadah di kawasan penagihan yang dikenal pasti dan memproses mereka yang disahkan sebagai penagih dadah untuk menjalani rawatan dan pemulihan di institusi atau komuniti;
- iii. program operasi bersepadu - pengesanan dan penahanan pengedar-pengedar dan penagih-penagih dadah secara bersepadu, termasuk memproses mereka yang disahkan penagih untuk menjalani rawatan dan pemulihan di institusi atau komuniti;
- iv. program media baru, luar dan statik - pendidikan pencegahan melalui sebaran maklumat, dan pengetahuan bagi meningkatkan kesedaran bahaya dadah dan promosi gaya hidup sihat kepada pelbagai kumpulan sasaran;
- v. program *Community Empowerment* - memberi pengetahuan dan kefahaman mengenai bahaya dadah dan menyedarkan komuniti termasuk pemimpin mengenai peranan dan tanggungjawab mereka dalam merancang, menggerakkan dan melaksanakan aktiviti pendidikan pencegahan serta rawatan dan pemulihan dadah di dalam komuniti; dan
- vi. program ikon antidadah - pendidikan pencegahan melalui perantara tokoh atau personaliti berpengaruh sebagai ejen

30

promosi dan kempen, duta antidadah dan *role-model* kepada kumpulan sasar yang dikenal pasti.

Dari Januari hingga Jun 2017, sebanyak 5,340 aktiviti yang melibatkan keenam-enam program ini telah dijalankan dan ini mencapai 63% daripada sasaran *Key Performance Indicator* (KPI) 2017, 8,448 aktiviti.

Untuk makluman ahli Yang Berhormat, sebanyak 136 buah kawasan FELDA telah dikenal pasti sebagai kawasan berisiko tinggi dengan permasalahan dadah termasuk penyalahgunaan syabu. Oleh itu, melalui program PDH yang melibatkan pelbagai pihak ini, diharapkan sarang penagihan di semua kawasan yang berisiko termasuk di FELDA dapat dibanteras dan dibersihkan.

Salah satu projek contoh program *Community Empowerment* ialah Projek 1 *Strategic Partner Community* (1SPC) yang merupakan inisiatif *National Blue Ocean Strategy* (NBOS) bersama Pejabat Setiausaha Kerajaan Negeri Sembilan dengan Agensi Antidadah Kebangsaan Negeri Sembilan.

Projek ini telah mendapat sokongan serta kerjasama yang amat baik dari Kerajaan Negeri Sembilan terutama dalam melaksanakan program-program dalam projek berkenaan seperti mana prestasi yang telah ditunjukkan ketika melaksanakan projek rintis di 7 buah kampung dan 7 kawasan FELDA di Negeri Sembilan. Asas paling utama dalam pelaksanaan projek ini

adalah semua program melibatkan komuniti setempat sebagai penggerak. Mereka dilibatkan sebagai tenaga pelaksana dengan dibantu oleh jabatan-jabatan terlibat. Perkara ini dilihat selari dengan matlamat Kementerian untuk melaksanakan program berbentuk *Community Base* agar tanggungjawab membasmi dadah ini dipikul bersama oleh setiap orang dalam komuniti. Program *Community Empowerment* terus diperkasa di semua negeri dengan kerjasama kerajaan negeri dan Pejabat Setiausaha Kerajaan Negeri.

Tuan Yang Dipertua,

Selain melaksanakan program PDH, usaha-usaha berterusan juga diambil bagi membanteras kegiatan penjualan dan pengedaran dadah yang diketuai oleh Polis DiRaja Malaysia (PDRM) seperti berikut:

- i. mempertingkatkan kerjasama dengan lain-lain agensi penguatkuasaan tempatan dalam berkongsi maklumat risikan dan menjalankan operasi bersepadu;
- ii. mempergiatkan tindakan penguatkuasaan oleh *Special Tactical Intelligence Narcotics Group* (STING) untuk membanteras *drug kingpin* serta sindiket pengedaran dadah berskala besar;

- iii. menjalankan Ops Sarang secara berterusan di kawasan berisiko bagi membanteras pengedaran dan penagihan dadah;**
- iv. mengambil tindakan pencegahan di bawah Akta Dadah Berbahaya (Langkah-Langkah Pencegahan Khas) 1985 ke atas sindiket dan individu yang menjadi dalang kegiatan pengedaran dadah;**
- v. menjalankan risikan terperinci untuk mengesan dan mengambil tindakan undang-undang ke atas sindiket dan pengedar yang terlibat; dan**
- vi. melumpuhkan sumber kewangan individu atau sindiket pengedaran dadah melalui penyitaan harta di bawah Akta Dadah Berbahaya (Perlucuthakan Harta) 1988**